

**Lima Pemimpin Kanan SPDP Hadapi Tindakan Disiplin
Bernama
13 September , 2011**

KUCHING, 13 Sept (Bernama) -- Lima anggota majlis tertinggi Parti Demokratik Progresif Sarawak (SPDP), kesemuanya wakil rakyat, berhadapan tindakan disiplin kerana didakwa gagal mematuhi beberapa peraturan parti.

Mereka terdiri Naib Presiden Kanan Datuk Peter Nansian yang juga Anggota Dewan Undangan Negeri kawasan Tasik Biru, Sylvester Entri Muran (Adun Marudi), Rosey Yunus (Adun Bekenu), Paulus Palu Gumbang (Adun Batu Danau) dan Datuk Dr Tiki Lafe (Anggota Parlimen Mas Gading).

"Saya dan anggota majlis tertinggi yang lain sudah cukup bersabar sejak dua tahun lalu, dan terserah kepada Jawatankuasa Disiplin untuk menentukan bentuk hukuman kepada mereka," kata Presiden SPDP Datuk Seri William Mawan Ikom kepada pemberita selepas mempengerusikan mesyuarat anggota majlis tertinggi di ibu pejabat SPDP di sini Selasa.

Mawan, yang juga Menteri Pembangunan Sosial dan Urbanisasi Sarawak, berkata beliau akan menunggu laporan daripada Jawatankuasa Disiplin yang dipengerusikan oleh Prof Dr Shafiq Abdullah sebelum menyerahkannya kepada pemimpin tertinggi Barisan Nasional (BN) di peringkat negeri dan pusat untuk tindakan seterusnya.

Menurutnya sebagai sebuah parti yang demokratik dan menekankan disiplin dalam parti, keutamaan adalah kepada parti dan bukannya individu dalam sesebuah parti.

Mengulas mengenai persiapan pilihan raya umum akan datang, Mawan berkata SPDP telahpun menetapkan tiga penyandang iaitu Anggota Parlimen Baram, Datuk Jacob Dungau Sangan (Timbalan Menteri Perdagangan Antarabangsa dan Industri), Anggota Parlimen Saratok, Jelaing Mersat (Timbalan Menteri Pengangkutan) dan Anggota Parlimen Bintulu Datuk Seri Tiong King Sing untuk mempertahankan kerusi masing-masing.

Bagi kerusi Mas Gading, Mawan berkata beliau sedang menunggu keputusan daripada Tiki sama ada mahu bertanding atau tidak.

--BERNAMA

Hakcipta© 2011 BERNAMA

Source:<http://www.bernama.com/bernama/v5/bm/newspolitic.php?id=613159>